

ՀԱՆԴԻՊՈՒՄ

ՄԵԼԳՈՆՅԱՆԻ ՀԱՐՅՈՒ ՄՆՈՒՄ Է ԱՌԿԱՆ



Հայաստանի խորհրդարանի 15-ամյակին նվիրված տոնակատարություններին մասնակից հաջորդ գրուցակիցս Կիպրոսի խորհրդարանում հայ համայնքի նորընտիր ներկայացուցիչ Վահագն Ադամյանն էր, որի հետ գրուցեցի Մելգոնյան կրթական հաստատության ինդիքների շուրջը:

«Կիպրոսի կառավարությունը դեմ է, որ Մելգոնյան կրթական հաստատությունը փակվի, քանի որ միակն է համարվում, որն ունի գիշերօթիկ եւ ցերեկային բաժիններ եւ զուտ հայկական դաստիարակություն է տալիս», նշեց պրն Ադամյանը եւ ավելացրեց, որ «Կիպրոսի կառավարությունը ցանկանում է պահպանել իր երկրում գործող փոքրամասնությունների լեզվի, մշակույթի օջախները: Այժմ մենք շատ դժվար իրավիճակում ենք, եւ մեզ են միացել նաեւ աշխարհի տարբեր ծայրերում ապրող մելգոնյանցիները, եւ չենք ուզում, որ Մելգոնյանը փակվի, ելքեր ենք փնտրում ու ձեռք մշակում, որպեսզի կարողանանք շարունակել անցյալի ավանդույթները»: Իսկ հաջորդ հարցին, թե եղե՞լ են արդյոք հանդիպումներ կրթական հաստատության ղեկավարների հետ, նա պատասխանեց. «Երբ 1,5 տարի առաջ Մելգոնյանի փակման լուրն իմացանք, դիմեցինք կառավարությանը՝ օգնության: Կառավարությունը մի քանի հանդիպումներ է ունեցել Մելգոնյանի Ամերիկայի կենտրոնական վարչության հետ, սակայն մինչեւ հիմա անորոշ վիճակում ենք եւ չգիտենք՝ փակվելո՞ւ է, թե՞ ոչ: Այսօր արդեն փակ է ու չի գործում Մելգոնյանի ուսումնական մասը, գործում է միայն գիշերօթիկ վարժարանը որպես

հյուրանոց: Նշեմ նաեւ, որ Կիպրոսի խորհրդարանն էլ կողմնակից է, որ Մելգոնյանը բաց լինի եւ պատրաստ է բոլոր վարձերն ու ծախսերը հոգալու, սակայն ՀԲԸՄիության ղեկավարության մտադրությունն է, որ գործի հայկական վարժարանը միայն ցերեկային ուսուցմամբ, առանց գիշերօթիկի: Միանշանակ է Մելգոնյանի սաների միության որոշումը, եւ գտնում ենք, որ Մելգոնյանը գոյատեւելու համար պետք է գիշերօթիկ վարժարանը լինի, քանի որ Կիպրոսի հայ գաղութը չի կարող 50-60 աշակերտներով դպրոց պահել»:

Վահագն Ադամյանը 14 տարի լինելով «Նարեկ» նախակրթարանների հոգաբարձուների ատենապետը, Կիպրոսի կառավարությանը եւ խորհրդարանին օգնության խնդրանքով SOS է բարձրացրել, որպէսզի չփակվի Մելգոնյանը, եւ խնդրել, որ հայկական վարժարան-գիմնազիւ բացվի Կիպրոսում: «Մեր հիմնական նպատակն է այս գիմնազիւայում հավաքել մեր աշակերտներին, որպէսզի չթողնեն ու գնան օտար վարժարաններ ու ձուլվեն: Եթէ հաջողվի Մելգոնյանը հետ ստանալ, արդէն բավականին աշակերտներ կունենանք»:

«Իսկ այդ հարցին ինչպե՞ս է արձագանքում համայնքը» իմ հարցին եղավ պատասխան. «Այսօր մոտ 3000 հոգանոց համայնքը միացած է այս վերջին երկու ամիսներին ու ցանկանում է Մելգոնյանը բացված ու գործող տեսնել: Եթէ անցյալում ումանք տարակուսում էին, այժմ հստակ միացել են մեր շարժմանը եւ մեզ հետ պայքարում են: Մելգոնյանն, ինչպէս կտակում է նշված, պետք է մնա Կիպրոսում, իսկ եթէ ցանկանում են՝ կարող են վարժարանին կից հողերը վաճառել եւ այդ գումարներն այլ նպատակներով ծախսել: Այսպէս է մտածում նաեւ Մելգոնյան սաների միությունը:

«Կիպրոսի ու Հայաստանի խորհրդարանների կապերը շատ ամուր հիմքերի վրա են, մշակվել են մի շարք բնագավառների համագործակցության ծրագրեր, որ կյանքի պիտի կոչենք: Մենք իբրեւ Կիպրոսի խորհրդարանի պատգամավորներ պատրաստ ենք Հայաստանին աջակցել, որ ընդունվի Եվրոպայի կազմի մեջ: Հայաստանը եւ Կիպրոսը նույն ձգտումն ունեն, որ թուրքական բանակը Կիպրոսից դուրս գա, եւ Թուրքիան ընդունի, որ Կիպրոսն արդէն իսկ Եվրոպայի անդամ է: Չես կարող մի տուն մտնել անկոչ հյուրի պէս եւ տանտիրոջը չճանաչես ու չընդունես: Իսկ սահմանների բացումն ու Հայոց ցեղասպանության ճանաչումը Թուրքիան պետք է անպայման ընդունի, եթէ ոչ՝ չի կարող Եվրոպա մտնել», նշեց պրն Ադամյանը:

ՄԱՐԻԵՏԱ ՄԱԿԱՐՅԱՆ